

ZAKON

O IZMJENAMA I DOPUNAMA ZAKONA O DOPRINOSIMA

U Zakonu o doprinosima ("Službene novine Federacije BiH", broj 35/98) vrše se sljedeće izmjene i dopune:

Član 1.

Član 11. mijenja se i glasi:

"Obračun i uplatu doprinosa za obveznike doprinosa iz člana 4. Zakona vrši isplatilac plaće i drugih ličnih primanja-rezident Federacije prilikom svake isplate i to:

a) na plaće, naknade plaća i druga lična primanja zaposlenika po osnovu redovnog rada i izvan redovnog rada, doprinosi se obračunavaju na dan njihove isplate, a plaćaju se u roku od sedam dana od dana kada je isplata izvršena;

b) na svoju plaću, fizičko lice koje samostalno obavlja privrednu, profesionalnu ili drugu djelatnost kao osnovno zanimanje, koje se bavi zemljoradnjom kao jedinim ili osnovnim zanimanjem, kao i ono koje je zaposleno kod nerezidenta Federacije i ostali obveznici doprinosa dužni su sami obračunavati i plaćati doprinose do 7. u mjesecu za protekli mjesec;

c) za obveznika koji je na teritoriji Federacije BiH zaposlen kod nerezidenta Federacije, obračun i uplatu doprinosa može vršiti i pravno ili fizičko lice-nerezident Federacije i to do 7. u mjesecu za protekli mjesec.

Prilikom isplate svake plaće i drugog primanja isplatilac je dužan zaposleniku-obvezniku doprinosa, iz člana 4. tačka 1. Zakona o doprinosima, izdati jedan primjerak obračuna bruto-plaće i doprinosa."

Član 2.

Iza člana 11. dodaje se čl. 11a. i 11b. koji glase:

"Član 11a.

Isplatioci plaća i drugih ličnih primanja i fizička lica iz člana 1. stav 1. tač. b) i c) ovog zakona, dužni su za svaku isplatu plaće sačiniti specifikaciju o isplati primanja i obračunu i uplati poreza i doprinosa i dostaviti je zajedno sa

dokazima o izvršenoj isplati nadležnoj ispostavi Porezne uprave Federacije BiH istog dana, a najkasnije narednog dana po izvršenoj isplati.

Član 11b.

Poslodavac-isplatilac plaće i drugih ličnih primanja, kao i fizička lica iz člana 1. stav 1. tač. b) i c) ovoga zakona, doprinose iz plaća i doprinose na plaću usmjeravaju u skladu sa propisima odnosno podzakonskim aktima donesenim na osnovu ovog zakona odgovarajućem korisniku odnosno korisnicima.“

Član 3.

Član 12. mijenja se i glasi:

“Uplata doprinosa vrši se u KM.

Doprinosi se uplaćuju po vrsti na propisane uplatne račune putem ovlaštenih organizacija za obavljanje unutrašnjeg platnog prometa (OOPP).“

Član 4.

Iza člana 14. dodaju se novi čl. 14a., 14b. i 14c. koji glase:

“Član 14a.

U slučaju neplaćanja doprinosa u roku, nadležna Porezna uprava će donijeti rješenje o prinudnoj naplati.

Na osnovu ovog rješenja, Porezna uprava može zahtijevati prinudnu naplatu doprinosa prijenosom dugovanog iznosa sa bilo kojeg računa isplatioca plaća, otvorenog kod OOPP, na propisane uplatne račune javnih prihoda, kao i naplatu iz cjelokupne imovine isplatioca plaća.

Član 14b.

Nadzor nad obračunavanjem i plaćanjem doprinosa iz plaće i na plaću provodi Porezna uprava Federacije BiH.

Član 14c.

Evidencije o obračunatim i uplaćenim doprinosima iz plaća i na plaće vodi organizaciona jedinica Porezne uprave na čijem području se nalazi sjedište

isplatioca-pravnog lica i fizičkog lica koje samostalno obavlja djelatnost, odnosno prebivalište fizičkog lica iz člana 1. stav 1. tač. b) i c) ovog zakona.“

Član 5.

Član 15. mijenja se i glasi:

“Novčanom kaznom većom od utvrđenih doprinosa iz plaće i na plaću kaznit će se za prekršaj pravno lice i fizičko lice koje samostalno obavlja djelatnost, ako u roku, utvrđenom ovim zakonom, na uplati doprinose na plaću i iz plaće i to:

do dvostrukog iznosa neplaćenih doprinosa za zakašnjenje duže od 30 dana;

do trostrukog iznosa neplaćenih doprinosa za zakašnjenje duže od 60 dana;

do peterostrukog iznosa neplaćenih doprinosa za zakašnjenje duže od 90 dana.

Za prekršaj iz stava 1. ovog člana kaznit će se i odgovorno lice u pravnom licu novčanom kaznom do 2.000 KM.“

Član 6.

Član 16. mijenja se i glasi:

“Novčanom kaznom u visini do deseterostrukog iznosa manje obračunatih i uplaćenih doprinosa na plaću i iz plaće kaznit će se pravno i fizičko lice koje samostalno obavlja djelatnost za koju Porezna uprava Federacije BiH utvrdi da je kao isplatilac plaće obračunalo i uplatilo doprinose ispod stvarnih iznosa.

Za prekršaj iz stava 1. ovog člana kaznit će se i odgovorno lice u pravnom licu novčanom kaznom do 2.000 KM.“

Član 7.

Član 17. mijenja se i glasi:

“Novčanom kaznom u visini do dvostrukog iznosa utvrđenog doprinosa na plaću i iz plaće kaznit će se za prekršaj fizičko lice-zaposlenik, iz člana 1. stav 1. tač. b) i c) ovog zakona, za koje Porezna uprava Federacije BiH utvrdi da u zakonom propisanom roku nije platilo doprinose na plaću i iz plaće na svoja primanja koja se, prema odredbama ovog zakona, smatraju plaćom.“

Član 8.

Iza člana 17. dodaje se novi član 17a. koji glasi:

“Član 17a.

Novčanom kaznom od 1.000 do 5.000 KM kaznit će se pravno lice i fizičko lice koje samostalno obavlja djelatnost, ako kao isplatilac plaće Poreznoj upravi Federacije BiH ne dostavi u propisanom roku specifikaciju plaća ili drugih ličnih prihoda sa obračunatim doprinosima i dokazima o isplati plaća i uplati doprinosa.“

Član 9.

Ovaj zakon stupa na snagu osmog dana od dana objavljivanja u “Službenim novinama Federacije BiH“.

Predsjedavajući Doma naroda Parlamenta Federacije BiH prof. dr.Ivo Komšić,
s. r.

Zamjenik predsjedavajućeg Predstavničkog doma Parlamenta Federacije BiH
Ivan Brigić, s. r.